

10 FEB 2000

Sabah-Luncur Udara

SABAH ANJURKAN LUNCUR UDARA BERMOTOR DUNIA

KOTA KINABALU, 10 Feb (Bernama) -- Orang ramai di Sabah akan berpeluang menyaksikan sukan udara bertaraf dunia apabila "Pengembaraan Luncur Udara Bermotor Dunia -Jelajah Malaysia - Sabah 2000" diadakan selama lapan hari, bermula Sabtu ini.

Pertunjukan yang disertai 30 peluncur udara bermotor termasuk tiga dari Malaysia itu akan mempamerkan kebolehan mereka di enam daerah di negeri ini.

Antara negara yang mengesahkan penyertaan mereka ialah Rusia, United Kingdom, Perancis dan Belgium.

Ketua Menteri Datuk Osu Sukam dijangka melancarkan pertunjukan luncur udara bermotor itu pada 12 Feb ini di Karambunai, dekat sini.

Ketika mengumumkan penganjuran sukan udara bertaraf dunia itu hari ini, Menteri Pembangunan Belia, Kebudayaan dan Kemajuan Sukan Negeri Datuk Rubin Balang berkata ia bertujuan menarik lebih ramai pelancong ke negeri ini yang menyambut Tahun Melawat Sabah 2000, tahun ini.

Acara itu juga merupakan susulan daripada saranan Perdana Menteri Datuk Seri Dr Mahathir Mohamad semasa merasmikan kejohanan "Hang-Gliding Championship" di Kundasang tahun lepas, katanya.

Rubin berkata selain di Kota Kinabalu, pertunjukan itu turut diadakan di daerah Tuaran, Ranau, Sandakan, Semporna dan Tawau.

Beliau berkata pengembaraan luncur bermotor itu dianjurkan bersama oleh Kementerian Pembangunan Belia, Kebudayaan dan Kemajuan Sukan Sabah, dan Aerospace Industries Malaysia Sdn Bhd.

-- BERNAMA

NT NMO